



Publicaziuns dalla vischnaunca, jamna 50

Cussegl da vischnaunca

Rapport dalla seduta dils 9-12-2016

Ella davosa seduta dalla perioda d'uffeci 2013-2016 sut il tgamun da Livio Zanetti ha il cussegl da vischnaunca tractau la cunvegna da prestaziun Center da formaziun Surselva, la damonda da credit per la canalisaziun Acletta-Funs sco era il studi davart la realisabladad d'ina colligaziun dils uclaus Segnas-Acletta.

Center da formaziun Surselva – Cunvegna da prestaziun

En connex cun la refurma dil territori ein las incaricas dallas regiuns vegnidas definidas da niev. Previu ei che las regiuns adempleschien mo pli incaricas adossadas dallas vischnauncas ni dil cantun. Tochen a present ha la suprastanza communal approbau las cunvegna da prestaziun cun la Regiun Surselva concernent la dismessa da rumien, il svilup regiunal, la contribuziun al gimnasi Claustra Mustér, il traffic public, la controlla da bulius e la finanziaziun a museums regiunals. La davosa cunvegna da prestaziun pertucca il Center da formaziun Surselva. Quella cumpeggia la scola da musica Surselva, il survetsch logopedic Surselva, la scola Vinavon, la promoziun d'affons special talentai, la scola professiunala commerciala Surselva, la scola professiunala industriala Surselva, la scola media mercantila e propedeutica Surselva e la scola mercantila dil di Surselva. Ils cuosts comunabels per ademplir las incumbensas regiunals vegnan per regla reparti sin las vischnauncas en fuorma d'ina contribuziun fundamentala da maximalmein in tschunavel dils cuosts sco era tenor il diember da habitonts e la forza finanziaria. Per tut ils secturs d'incumbensas vegn menau in agen quen. Suenter ina cuorta discussiun ha il cussegl da vischnaunca approbau unanimamein la cunvegna da prestaziun per il Center da formaziun Surselva. Cun quei ch'ils cuosts annuals muntan a rodund 115 000 francs, sto la fatschenta vegnir suttamessa alla votaziun dil pievel.

Project da canalisaziun Acletta-Funs

Las investiziuns ad Acletta e contuorn han per consequenza che las reits da canalisaziun, dil provediment d'aua, dalla telecomunicaziun, dall'energia electrica e tenor situaziun dil scaldament lontan ston vegnir adattadas e dimensiunadas da niev. Gia il concept general pigl allontanament e la purificaziun dallas auas preveda per Acletta differents implonts per descargar la reit da canalisaziun entochen alla serenera a Raveras. Il project da canalisaziun preveda ina lingia da transport per l'aua schubra el sidost dalla surbaghegiada Reka, parzialmein la dislocaziun dalla canalisaziun d'aua tschuffa a Sontga Catrina e plinavon la colligaziun dil quartier Vitget Crestas al Crest d'Acletta cun la canalisaziun nova. Cheutras sa la lingia d'aua tschuffa el cass da malauras vegnir descargada. L'aua schubra vegn menada egl Ual d'Acletta. La Corporaziun d'aua Spina da Vin e l'interpresa pil provediment d'energia Repower AG realiseschan lur reits en collaboraziun cun la vischnaunca. Vidlunder vegnan ils ulteriurs purtaders da telematica ed eventualmein era il scaldament lontan. Aschia san las sinergias vegnir nezegiadas da maniera optimala ed ils cuosts per las lavurs da tratsch vegnir reparti sin ils differents pertuccai. La damonda per in credit da 435 000 francs al cussegl da vischnaunca ensiara denton sulettamein ils cuosts ch'occuran alla vischnaunca. La realisaziun dil Catrina Resort pretenda pliras investiziuns sil sector dall'avertura e dil provediment. Ulteriuras investiziuns san vegnir cumbinadas cul project dil rempar Val Acletta. Ei setracta denton era da liquidar pendenzas da pli baul, sedadas en connex cul project dil vitg da vacanzas dalla Reka. Suenter ina cuorta discussiun conceda il cussegl da vischnaunca unanimamein il credit da 435 000 francs, il qual vegn suttamess al referendum facultativ.

Studi davart la realisabladad d'ina colligaziun dils uclaus Segnas-Acletta

Ils 9 d'october 2015 ha cusseglier Edgar Durschei cun endisch consutsignaders inoltrau la moziun «Studi da factibilitad (Machbarkeitsstudie) pertuccont ina colligaziun dils uclaus Segnas-Acletta cun ina via per promover l'attractivita e la mobilitad dils uclaus. Plinavon duei il studi cuntener propostas co sliagar igl access naven dalla scola Segnas entochen a Peisel cun camiuns ed autocars.» La finamira ei da colligiar ils dus uclaus cun ina via per promover l'attractivita e la mobilitad per la veta quotidiana. Il bus local duess circular durant la stad ed igl unviern naven dil center dil vitg sur ils dus uclaus e returnar puspei el center dil vitg cun surprender il transport dils affons da scola. In'ulteriura finamira ei da possibilitar in access cun autocars e camiuns (lenna) naven dalla scola a Segnas entochen a Peisel. Cheutras san ils camiuns da lenna cun grondas peisas vegnir sviai. Actualmein eis ei buca pusseivel da carrar cun camiuns ed autocars sper la baselgia vi muort il stretg passadi. Suenter l'approbaziun dalla moziun ha la suprastanza communal incaricau in biro d'inschignier da sviluppar



propostas per in'untgida da Segnas enviers Peisel ed ina colligiazion cun Aletta. Ei dat plirs aspects positivs che plaidan per ina realisaziun d'ina colligiazion dils uclauns. La suprastanza communal ha denton suenter detagliada e minuziusa ponderaziun – cunzun ord motivs finanzials – stuiu proponer al cussegl da vischnaunca da buca persequitar vinavon il project. L'untgida da Segnas duei denton vegnir examinada el rom d'ina sliigiazion concepziunala per las vias d'uaul. Corripundentamein alla proposta dalla suprastanza communal ha il cussegl da vischnaunca priu enconuschientscha dil studi da variantas e declarau la moziun per liquidada. Alla fin dalla seduta ei vegniu inoltrau dus postulats. Rita Huonder-Tenner cun dudisch consutsignaders han inoltrau in postulat «Scaffir novas plazzas el subcenter Disentis/Mustér». Edgar Durschei e treis consutsignaders han inoltrau in postulat «Instradar ina discussiun sur dallas structurass politicas per esser semtgais sin las proximas elecziuns da 2020».

Suprastanza communal

Referendum facultativ

A caschun da sia seduta dils 9 da december 2016 ha il cussegl da vischnaunca approbau unanimamein in credit net da 435 000 francs per realisar il project da canalisaziun Aletta–Funs. Conform ad art. 21, lit. c dalla constituziun communal ei quella decisiun suttamesa al referendum facultativ. Il messadi tier sura fatschenta ei exponius per investa en casa communal (stanza nr. 10). Enteifer 20 dis dapi la publicaziun officiala han 80 votants la pusseivladad d'inoltrar enviers sura concs il referendum e pretender ina votaziun dil pievel.

Suprastanza communal

Reducziun individuala dallas premias dalla cassa da malsauns 2016

Persunas e famiglias che vivan en relaziuns economicas mudestas san, risguardond certas premias, dumandar contribuziuns vid las premias dall'assicuranza da basa obligatoria per la tgira da malsauns (LAM).

Persunas che han uonn aunc buca fatg diever da quei dretg, san far quei entochen **la fin digl onn 2016 (davos termin, datum dil bul da posta 29-12-2016)**.

Informaziuns, basa legala, muossavia ed il formular d'annunzia ein d'anflar sin la pagina d'internet www.sva.gr.ch. Ils formulars san era vegnir retratgs tier l'administraziun communal.

Per damondas stat il persunal dall'administraziun communal bugen a disposiziun.

Administraziun communal

Administraziun communal

Sur las fiastas da **Nadal e Daniev** ei l'administraziun communal **serrada** ils suandonts dis:

- gliendisdis e mardis, ils 26 e 27 da december 2016
- venderdis, ils 30 da december 2016
- gliendisdis, ils 2 da schaner 2017

Nus giavischein ina biala fiasta da Nadal ed in bien onn 2017!

Administraziun communal

Societad da musica Mustér

Concert da Nadal, sonda, ils 17-12-2016 allas 20.00 en baselgia Sogn Gions, Mustér. Entrada libra, collecta.



Exposiziun d'art 2016 a Segnas

La tradiziunala exposiziun d'art ha liug uonn en casa da scola Segnas: **Sonda, ils 17 da december 2016**, allas 14.00–20.00. **Dumengia, ils 18 da december 2016**, allas 14.00–19.00. **Gliendisdis, ils 26 da december 2016**, allas 14.00–19.00 mintgamai cun uustria.

Cordial beinvegni

Chor baselgia Segnas

Schubergiar e rugalar apparats d'udida

Gliendisdis, ils 19 da december 2016 saveis Vus schar schubergiar e rugalar Vies apparat d'udida:

09.15–10.30 en Casa sogn Martin a Trun

11.00–11.40 en Casa sogn Giusep a Cumpadials

13.15–14.30 el Puntreis, Center da sanadad a Mustér

Las firmas Amplifon cun dunna Roffler e Jäggi cun signur Gfeller sorprendan comunablamein quei survetsch gratuit per tuts interessents. Ei drova negina annunzia.
